

Dragi prijatelji/ce,



Predstavljamo vam **martovsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **181** organizacija i **115** pojedinaca iz **75** gradova/opština/mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni

period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestija, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

S A D R Ž A J

Aktivnosti u martu 2016.	2
Planovi za april 2016.	5
Aktivnosti članova mreže	6
Saopštenja / donatori / pozivi.....	24

AKTIVNOSTI ORC / HCA U MARTU 2016.



Anna Lindh Fondacija Bosanskohercegovačka mreža

Projekat „Vašar kulture“



Anna Lindh Fondacija je, u okviru javnog poziva „Interkulturalne akcije mreža“ u BiH, podržala projekat „Vašar kulture“ DIS Pozorišta mladih Banja Luka, sa partnerima: Udruga Enter Vitez, Proni Brčko, Prosvjeta Višegrad i ORC Tuzla.

U okviru ovog projekta, U Banja Luci je, u periodu od 31. marta do 3. aprila održan festival: „Vašar Kulture“. U okviru festivala održane su četiri predstave u večernjem terminu, revija festivalskih filmova (Tuzla Film Festival – Festival južnoslovenskog filma), četiri predstave pozorišnih mladih nada, izložbe, radionice, berza kulturne ponude, edukativne radionice, tribine, razgovori sa i bez povoda, šarena zabava i još mnogo

toga... Ulaz na VAŠAR KULTURE bio je besplatan.

Festival je okupio veliki broj mladih iz Bosne i Hercegovine i susjednih zemalja, koji su tokom četiri dana trajanja imali prilike Banjalučkoj publici pokazati svoje pozorišno/teatarsko/kazališno umijeće, ali isto tako i naučiti nešto tokom edukativnih i pozorišnih radionica, pogledati dobre filmove i – prije svega – dobro se zabaviti.

Prekogranična građanska mreža za mir, pomirenje i sigurnost ljudi na Balkanu



Claim!

CITIZEN'S NETWORK FOR PEACE, RECONCILIATION AND HUMAN SECURITY

Projekat „*Prekogranične građanske mreže za mir, pomirenje i sigurnost ljudi na Balkanu*“ implementira Helsinški parlament građana Turska, zajedno sa partnerima: ADP ZID Crna Gora, SeConS Srbija, Institut za regionalne i internacionalne studije Bugarska, Centar za istraživanje, dokumentaciju i publikovanje Kosovo, Omladinski resursni centar Tuzla. Projekat je podržan od Evropske Unije.

Tokom marta smo radili na pripremi za publikovanje rezultata istraživanja koje smo radili u prethodnom periodu. Isto tako, radili smo i na pripremi konsultativnog sastanka stakeholdera, koji će se održati u Tuzli, 8. aprila ove godine. Svrha ovog konsultativnog sastanka je predstavljenje projekta, predstavljanje rezultata istraživanja, te sagledavanje pretpostavki i mogućnosti za buduće aktivnosti (2016. – 2017.) u eventualnom zajedničkom djelovanju, koje bi mogle doprinijeti povećanju sigurnosti mladih u kolektivnim centrima i poboljšanju situacije u kojoj ovi mladi ljudi žive. Na sastanku se očekuje učešće oko 20 učesnika - predstavnika relevantnih ministarstava iz FBiH, RS i Brčko Distrikta Bosne i Hercegovine, te predstavnika opštinskih/općinskih odjeljenja i predstavnika institucija koje se bave pitanjima raseljenih lica i izbjeglica.

Partnerski projekat – „Divided past – joint future“



Cilj ovoga partnerskog međunarodnog projekta je jačanje regionalne saradnje i kapaciteta, kako bi se uvećala kredibilnost, političko učešće i efektivnost u zagovaranju prevencije radikalizacije, kao i facilitiranje međuetničkog dijaloga u regiji zapadnog Balkana i Turske, kroz implementaciju međuakterskog pristupa koji će podsticati društvenu rekonstrukciju. Nosilac projekta je Omladinski komunikativni centar (OKC) Banja Luka, a partneri 17 nevladinih organizacija iz: Bosne i Hercegovine, Srbije, Crne Gore, Austrije, Makedonije, Turske, Hrvatske, Holandije, Kosova, Slovenije i Albanije. **Projekat je finansiran od strane Evropske Unije**, a tokom četiri godine trajanja projekta biće organizovan veliki broj aktivnosti.

U okviru ovoga projekta u Banja Luci je, od 22. do 23. marta održan pripremni sastanak partnera, u organizaciji OKC Banja Luka. Na sastanku su potpisani ugovori, te definisane smjernice za dalji rad. Na ovom sastanku je ispred ORC Tuzla učestvovao Miralem Tursinović. Više informacija o aktivnostima u narednom periodu na našoj web stranici: www.omladina-bih.net, te u biltenima i na mejling listama.

Omladinska grupa ORC Tuzla

TURNIR U FUTSALU

Tuzla je još jednom ponijela epitet grada sa najnižom stopom diskriminacije, i to ovaj put zahvaljujući našim vrijednim omladincima koji su za svoje sugrađane organizovali turnir u futsalu pod nazivom „Fudbal za sve“. „Fudbal za sve“ okupio je osam najboljih studentskih i srednjoškolskih ekipa, koje su se međusobno nadmetale za epitet najbolje ekipe ovog turnira.



Zasluzeno prvo mjesto je osvojila ekipa Unije studenata Tuzla, koja je u finalu savladala tim sastavljen od studenta Medicinskog fakulteta Univerziteta u Tuzli. Još jedna krasna priča i prelijepa poruka je otišla iz našeg grada u čitavu Bosnu i Hercegovinu! Ne diskriminaciji, jer je „Fudbal za sve“!

Koorganizator ovog turnira bio je Katolički školski centar „Sveti Franjo“ Tuzla, te se ovom prilikom srdačno zahvaljujemo rukovodstvu škole. Turnir je finansiran od strane organizacije „Fudbal protiv homofobije“.

► KOALICIJA „POD LUPOM“



Koalicija “Pod lupom” je u Tesliću od 18. do 20. marta organizovala trening za vršnjačke edukatore iz čitave Bosne i Hercegovine povodom izbora koji će se održati u oktobru ove godine. Edukatori koji su sada obučeni za rad sa mladima na temu izbora će tokom aprila edukovati oko 15.000 mladih kroz 672 interaktivne radionice u čitavoj BiH.

Jedan od učesnika edukacije bio je koordinator naše omladinske grupe Slobodan Blagovčanin.

► EKO PSIHIJARIJA

Velika omladinska akcija koja je okupila preko 100 studenata i mladih iz Tuzle organizovana je na psihijatrijskoj klinici Univerzitetskog kliničkog centra u Tuzli. Mladi su se 19. marta okupili i zajedno krenuli u EKO akciju čišćenja prostora Psihijatrije, koja se nalazi u tuzlanskom naselju Solina.

Akciju su organizovali Klinika za psihijatriju UKC-a Tuzla, u saradnji sa omladinskim nevladinim organizacijama iz našeg grada.

Jedan od organizatora akcije bio je i Omladinski resursni centar Tuzla.



► INFO DAN O EU PROGRAMU ERASMUS+ IZ OBLASTI MLADIH

U Parlamentarnoj skupštini Bosne i Hercegovine, 29. Marta 2016. Godine održan je info dan o programu Evropske unije **Erasmus+** iz oblasti mladih. Organizator Info dana bila je organizacija PRONI centar za omladinski razvoj iz Brčkog, u saradnji sa Ministarstvom civilnih poslova Bosne i Hercegovine. Događaj je okupio preko 60 mladih ljudi iz Srbije i Bosne i Hercegovine. Omladinski resursni centar Tuzla predstavljali su Adi Selman i Slobodan Blagovčanin.



► 1. STEPS KONFERENCIJA



31.03.2016. godine u Sali Bosansko-kulturnog centra u Tuzlu održana je 1. STEPS konferencija. Konferenciju je organizovalo udruženje građana „Multi“ iz Tuzle u saradnji sa Ekonomskim fakultetom Univerziteta u Tuzli i Fondacijom tuzlanske zajednice.

Na konferenciji je prisustvovalo oko 300 mladih ljudi, studenata, srednjoškolaca. Predstavnici Omladinske grupe Omladinskog resursnog centra su bili: Jasnima Begović, Adi Selman, i Admir Isanović.

STEPS je imao za cilj da sa pozitivnim pričama

uspješnih ljudi iz različitih sfera društva inspiriše mlade da razvijaju svoj poduzetnički duh, i „sutra“ postanu ugledni članovi društva, uspješni bizismeni, poduzetnici.

Na konferenciji su između ostalih govorili: Safet Kozarević, Emir Bašić, Edin Mehić, Armin Talić, Alija Kamber, Tamara Efendić-Spahić, Omer Bakalović, Admir Čavalić, Jan-Zlatan Kulenović.

✚ PREDSTAVLJAMO MLADE!

MUHAREM GAŠI



Muharem Gaši je diplomirani Ekonom, smjer menadžment - sa orijentacijom na menadžment neprofitnog sektora. Sebe smatra objektivnom, ambicioznom i odgovornom osobom sa odličnim komunikacijskim i profesionalnim sposobnostima, koje je razvio tokom obrazovanja i svog nesebičnog zalaganja u nevladinom sektoru. Jedan je od prvih članova omladinske grupe ORC-a, učestvovao je u mnogobrojnim akcijama omladinske grupe, te ostalim aktivnostima (treninzi, edukacije, seminari i sl.). Vatreni je navijač Galatasaray-a i jedna od najsusretljivijih osoba u grupi.

NEDIM OSMANOVIĆ



Nedim Osmanović ima 18 godina, rođen i živi u Tuzli. Ima veliku strast prema doprinosu društvu u kojem živi. Volonter je i član brojnih nevladinih organizacija. Njegova prva iskustva sa volontiranjem, mnogo edukacija i seminara su počeli angažovanjem u Omladinskoj grupi ORC Tuzla. Nedim je završio Gimnaziju „Meša Selimović“, ali se ujedno može pohvaliti uspješnom prekvalifikacijom, te završetkom i Medicinske Škole Tuzla. Uz rad sa Omladinskom grupom Omladinskog resursnog centra Tuzla uspješno je realizovao mnoge akcije, seminare i edukacije.

REDOVNE AKTIVNOSTI ORC I HCA TUZLA:

Tokom marta smo radili na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte za ovu godinu.

PLANOVI HCA/ORC-A ZA APRIL 2016.

- Sprovođenje redovnih aktivnosti kroz Omladinsku mrežu BIH;
- Nastavak aktivnosti u okviru Prekogranične građanske mreže za mir, pomirenje i sigurnost ljudi na Balkanu (organizovanje sastanka sa stejkholderima, izdavanje publikacije - istraživanja);
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Nastavak rada na namicanju sredstava za 2016. godinu.



AKTIVNOSTI ČLANICA OMLADINSKE MREŽE BIH



ANESA HIDIĆ, član Omladinske mreže, pojedinac

OMLADINSKI KRUG KLADANJ


E-mail: anesahidic@hotmail.com

+ VEĆE POEZIJE O TEMI: „PERO O LJUBAVI I BRATSTVU“

Povodom 21. marta, kada se obilježava Dan poezije, No Hate Lt Kladanj organizirao je večer poezije. Mladi su odrecitovali nekoliko pjesama domaćih i svjetskih autora, a oni sa muzičkim talentom su odsvirali nekoliko pjesama. Pohvale za Anesu Hidić i Aminu Mašić.



+ PREDSTAVNICI LOT KUĆE POSJETILI OPĆINU KLADANJ



Predstavnici Turske vojne misije, članovi EUFOR- ovog "LOT TIMA" stacioniranog u Zavidovićima dana 17.03.2016. godine su posjetili općinu Kladanj, gdje su održali sastanak sa Općinskim načelnikom, Jusufom Čavkunovićem.

+ SASTANAK SA PREDSTAVNICIMA UDRUŽENJA INVALIDNOG SPORTA

U martu je u kabinetu Općinskog načelnika, Jusufa Čavkunovića održan sastanak sa predstavnicima Sportskog saveza invalida Tuzlanskog kantona i U.G. za sport i rekreaciju invalida općine Kladanj.

+ PROMOCIJA KNJIGE MR. DAMIR EF. BABAJIĆA: „MOJ POGLED NA ŽIVOT IZ KOLICA“

Promocija knjige mr. Damir ef. Babajića : „ Moj pogled na život iz kolica“ održala se dana 25.03.2016. godine u holu Doma kulture u Kladnju. Damir Babajić je mladi čovjek koji je u jednom trenutku svoga života izgubio ono najvrijednije što možemo imati - ZDRAVLJE. Knjiga je naišla na veliki odziv naših građana, posebno omladine.

+ KLADANJ UŠAO U PROJEKT ZA RURALNI RAZVOJ



Općina Kladanj velike potencijale ima u drvnjoj industriji, te u autohtonoj zanatskoj proizvodnji. Općina je ušla u program službenog naziva **IFAD 6**, koji za cilj ima razvoj poljoprivrede i ruralnih dijelova općine.

+ „ULOGA ŽENE U IZGRADNJI MIRA“ – OKRUGLI STO

„Uloga žene u izgradnji mira“ bila tema je okruglog stola koji je povodom Međunarodnog dana žena održan dana 10.03.2016. godine u Kladnju.

Više od 30 sudionika/ca okruglog stola ponijeli su u svoje porodice i na svoja radna mjesta neke od poruka koje su tematizirale uvodničarke profesorica političkih nauka na Univerzitetu Istočno Sarajevo Zlatiborka Popov Momčinović i koordinatorica međureligijskih projekata u Centru za edukaciju i istraživanje CEI NAHLA iz Sarajeva Azra Ibrahimović.

+ ODRŽAN IZBOR SPORTISTE OPĆINE KLADANJ ZA 2015. GODINU



U sali Doma kulture u Kladnju, u petak 11.03.2016. godine, u organizaciji Sportskog saveza općine Kladanj održana je manifestacija izbora sportiste općine Kladanj za 2015. godinu. Za najbolju sportistkinju 2015. godine izabrana je Ilma Čučak, dok je za najboljeg sportistu 2015. godine izabran Adi Bajić.



ASOCIJACIJA SREDNJOŠKOLACA U BOSNI I HERCEGOVINI

Adresa: Mula Mustafe Bašeskije br. 7, 71 000 Sarajevo

Tel/fax: 033 205 850

e-mail: asubih@yahoo.com

web: www.asubih.ba

+ SVEČANA AKADEMIJA



18.03.2016. godine članovi Lokalnog tima Živinice održali su Svečanu akademiju u Plavoj sali Bosanskog kulturnog centra u Živinicama. Prigodan referat podnijela je počasna članica, Maida Nuhanović, saradnicima na podršci uručene su zahvalnice, dok su najaktivniji članovi Lokalnog tima Živinice dobili određena priznanja. U promociji pozitivnih priča istakla se Naida Nuhanović, koja je pročitala svoj dirljivi sastav o profesoricu Almi Šahbegović, ističući njene vrline kao stručnjaka nastave i čovjeka koji shvata mlade. Prisutna profesorica je uzvratila i rekla kako joj je boravak među učenicima nešto najljepše u životu. U kulturno-zabavnom dijelu programa učestvovali su vokalni solista Džana Trumić i

violinista Adnan Džekić.

+ FORUM SREDNJOŠKOLACA BANJA LUKA



Usudi se, (pri)druži se!

27.3.2016. godine (nedelja) u 18 časova u amfiteatru Doma omladine u Banja-luci održan je "Forum srednjoškolaca", u organizaciji Asocijacije srednjoškolaca u BiH (ASuBiH).

Forum srednjoškolaca za cilj ima promovisanje aktivnih mladih ljudi u Banja Luci, koji su svojim nesebičnim zalaganjem i trudom postigli značajan uspjeh, te će time motivisati druge mlade ljude oko sebe za rad i napredovanje.



Ulaz slobodan
Lokalni tim Banja Luka
Asocijacija srednjoškolaca u BiH

+ GLOBAL MONEY WEEK

ASuBiH se, kao jedina organizacija iz BiH, i ove godine pridružio projektu Global Money Week, koji se već petu godinu zaredom implementira na inicijativu organizacije Child&Youth Finance International.

Global Money Week (GMW) ove godine je 14.-20.3.. U tih sedam dana diljem naše divne planete, tačnije u nešto više od 100 država, održavat će se različite radionice na teme finansijske edukacije s ciljem podizanja svijesti o važnosti finansijskog obrazovanja mladih ljudi. U GMW-u su učestvovali lokalni timovi: Breza, Brčko, Fojnica, Istočno Sarajevo, Sarajevo, Prozor-Rama, Tuzla, Ilijaš i Goražde.



+ ZID DISKRIMINACIJE

Riječ je o projektu kojem je cilj da ukaže na ozbiljnost problema diskriminacije u našem društvu, ali i da utječe na svijest mladih ljudi i njihovo shvatanje različitosti, te na otklanjanje svih oblika predrasuda. Simbolično rušenje „zida“ na kojemu su bile ispisane poruke diskriminacije, pod sloganom „Srušimo zid – izgradimo mir“, predstavljalo je centralnu aktivnost projekta koji se provodi u sedam lokalnih sredina u BiH a u organizaciji njemačke omladinske fondacije „Učenici pomažu život“.

Na zidu diskriminacije učesnici na projektu ispisali su najčešće upotrebljavane riječi vrijeđanja i diskriminacije koje se mogu čuti u našim školama ali i na ulici. Ovo je samo jedan simboličan čin koji sigurno neće odmah promijeniti stvari i odnos među ljudima, ali hoće pomoći da se zamislimo nad riječima koje bi mogle biti upućene i nama, te ih u cilju međusobne tolerancije i zajedništva što prije izbacimo iz upotrebe.



Lokalni timovi koji su učestvovali u ovom projektu: Istočno Sarajevo i Gračanica, te neformalne grupe Novog Travnika, Mostara i Gradačca.

LOKALNI TIM - BANJA LUKA

https://www.youtube.com/watch?v=4z_4pnm6n8g&feature=share

+ OD IDEJE DO USPJEŠNOG BIZNISA



Članovi Lokalnih timova Sarajevo i Istočno Sarajevo su 16-03-2016. godine prisustvovali edukaciji "Od ideje do uspješnog biznisa" u organizaciji Burch Univerziteta.

+ STRATEŠKI SASTANAK

04-03-2016.godine održao se 2. strateški sastanak projekta "Friends without borders 2". Učesnici su se nalazili u prostorijama Edukacijskog fakulteta u Travniku, te polako pripremali svoje planove za razmjene koje će se desiti u periodu od maja do augusta 2016. godine. Sastanak je završen 06-03., sumiranje utisaka je počelo, kao i intenzivan rad na organiziranju razmjena. „Friends without borders“ („Prijatelji bez granica“) čiji je glavni donator Američka ambasada, je projekat koji podrazumijeva razmjenu srednjoškolaca u 14 gradova Bosne i Hercegovine i zasniva se na trodnevnim razmjenama „homestay“ karaktera, a



putne troškove, hranu, džeparac je obezbijedila Američka ambasada. U tome, lokalni timovi imaju zadatak da vrše i lokalno prikupljanje sredstava kako od općina, tako i privatnika, tako da bi svaka lokalna zajednica trebala još obezbijediti dodatnih 300 KM za ovu aktivnost.

POWER UP

U periodu od 26.2.- 29.2. godine održan je Power Up seminar, u organizaciji Schuler Helfen Leben BiH za 17 članova ASuBiH-a. Na seminaru su obrađene teme komunikacijskih i prezentacijskih vještina, pisanja projektnih prijedloga, projektni menadžment. Seminar je održao Trninić Ilija. Smatramo da će vještine i znanje koje su članovi usvojili doprinijeti bržem razvoju Asocijacije srednjoškolaca u Bosni i Hercegovini.





UDRUŽENJE „VOLONTERI I PRIJATELJI KONJIČKE REGIJE“ KONJIC

Civilnih žrtava rata 3, 88400 Konjic

Tel.: 061 610 127

E-mail: vipkkonjic@gmail.com

Web : www.vipk.info

FB: www.facebook.com/groups/220690771277915/

✚ ODRŽANA DRUGA SKUPŠTINA VIPK

U velikoj sali Doma izviđača 1. marta održana je II Skupština Udruženja „Volonteri i prijatelji konjičke regije“ (VIPK), kojoj su prisustvovali članovi i prijatelji udruženja iz Konjica. Uoči održavanja redovne godišnje sjednice, a povodom 1. marta Dana nezavisnosti Bosne i Hercegovine, članovi su položili cvijeće, proučili Fatihu i minutom šutnje dostojanstveno odali počast šehidima i poginulim borcima općine Konjic. Nakon intoniranja himne Bosne i Hercegovine, na sjednici je razmatrano 13 tačaka dnevnog reda. Delegati su usvojili Godišnji izvještaj za 2015. godinu, finansijski izvještaj i Program rada za 2016. godinu, te izabrali Aminu Sultanić, Muamera Lavića, Harisa Sultića i Muameru Tabak za nove članove Skupštine.



Podnoseći izvještaj Skupštini, predsjednik Upravnog odbora Adis Muhibić, konstatovao je veliki napredak u radu od prošle sjednice, koja je održana u februaru prošle godine, i istakao da smo učlanili još 23 mlade osobe, što svjedoči o pojačanom interesu za građanski aktivizam i volonterski rad za dobrobit zajednice u Konjicu. U prošloj godini vidljiv je napredak i u iniciranju aktivnosti i davanju ideja za rad udruženja od strane naših članova. Tako je 20 članova iniciralo 146 ideja, od kojih smo s uspjehom realizovali 72. Edukacija članstva vršena je kroz 35 raznih seminara, treninga i radionica širom BiH na kojima je učestvovalo 25 članova. Od tog broja 6 je certificirano.

Koalicije za slobodne i poštene izbore „Pod lupom“ i Udruženje civilnih žrtava rata općine Konjic dodjelili su nam zahvalnice za saradnju, a priznanje „Šampioni volonterizma“ stiglo nam je od strane Američke ambasada u Sarajevu.

Naši aktivisti su i prošle godine davali izjave za TV kuće i radio stanice, a o nama je pisalo 6 web portala od čega posebno izdvajamo tekst Gorana Sarića pod naslovom „Volonteri i prijatelji Konjica – recept jednog uspjeha“, objavljen na stranici respektabilne organizacije PEN Centar BiH.

Govoreći o daljim aktivnostima VIPK-a, potpredsjednica Upravnog odbora Almedina Kašić naglasila je da će aktivisti našeg Udruženja uvijek biti pri ruci ugroženim građanima u nevolji koji potraže pomoć na našoj adresi.

Dat ćemo svoj puni doprinos u izboru novog predstavnika NVO sektora u Konjicu i otkočiti proces u formiranju Vijeća mladih općine Konjic, te zajedno sa prof. Dubravkom Lovrenovićem krenuti u zajedničku borbu posredstvom novoformirane Fondacije „Mahir i Aleksa“ protiv vršnjačkog nasilja u Bosni i Hercegovini.

U ovoj godini ćemo obilježiti svojevrsan jubilej, prvih deset uspješnih godina promovirajući brošuru koju će pripremiti redakcijski tim našeg Udruženja.

Na kraju sjednice predsjednica Skupštine VIPK-a Elvira Ćosić odala je priznanje za vrijedni rad, te uručila zahvalnice našim donatorima, prijateljima i posebno uspješnim članovima udruženja.

Tom prilikom, za nesebičnu materijalnu, moralnu i prijateljsku podršku u radu Udruženja zahvalnice su dobili: PD IGMAN Konjic, NVO altruista SVJETLO Sarajevo, OŠ Seonica Konjic, Sejad Hakalović, Kemal Bešić, Minela Lavić, Huso Čilić, Dževad Kadić, Slađana Milunović i Nermin Halilović, dok su za prijateljsku podršku u radu na principima humanizma i solidarnosti nagrađeni Suad Golubić, Mirsada Greda, Vahid Delalić i Udruženje „Zajedno za naš grad“ iz Mostara.

Za izuzetnu saradnju i doprinos u radu Udruženja pohvaljeni su Almedina Kašić, Samra Alebić, Irma Kurtić, Amina Sultanić, Azra Šehić, Mirsad Čukle, Nejla Karkelja, Endi Omeragić, Ramiza Tabak, Mustafa Kurtić, Zuhra Omerović, Sanela Muhibić i Elvira Ćosić, a svojom odlukom Skupština je za 10 godina uspješnog vodstva udruženja nagradila aktuelnog predsjednika Adisa Muhibića.

✚ LUBAV, RAZUMIJEVANJE I PODRŠKA ZA DIJALIZNE BOLESNIKE KONJICA I JABLANICE



Udruženje dijaliznih bolesnika Konjic-Jablanica, uz pomoć Centra za hemodijalizu Opšte bolnice Konjic, volontera i drugih prijatelja, 09.03.2016. godine je veoma posjećenom tribinom, obilježilo Svjetski dan bubrega. Na tribini su govorili Smaila Boloban, predsjednica Udruženja, dr. Indira Španja, šefica Centra za hemodijalizu Bolnice Konjic, Adis Muhibić, predsjednik Udruženja „Volonteri i prijatelji Konjica“ (VIPK), kao i drugi članovi Udruženja dijaliznih bolesnika i gosti tribine. Pismo podrške Udruženju uputio je Tomislav Žuljević, predsjednik Udruge dijaliziranih i transplantiranih bolesnika FBiH. Veoma dirljive diskusije imale su tri srednjoškolke Adna Hakalović, Selma Teletović i Seida Boloban, te vijećnica

Općinskog vijeća Konjic Amira Temin (SDP), koje su političare i društvo u cjelini pozvale na više razumijevanja, solidarnosti i podrške ovim bolesnicima. Tom prilikom g-đa Temin, zajedno sa Laidom Opančić izrazila je želju da potpiše Donorsku karticu, što su prisutni pljeskom pozdravili. U ime Udruženja VIPK, jednog od organizatora tribine, predsjednik Muhibić, pored ostalog, rekao je da se VIPK kao organizacija civilnog društva bori za ljudska prava i dostojanstvo u Konjicu. „Čast nam je da tim ljudima budemo od pomoći i koristi, da im pomognemo u procesu preregistracije, uvezivanju sa federalnim savezom i uključivanju u općinski budžet“.

✚ VIPK NA JAHORINI UČESTVOVAO U ŠTABNOJ VJEŽBI: BORBA PROTIV NASILNOG EKSTREMIZMA.

Na Jahorini je u periodu od 01.-03.03.2016. održana interaktivna štabna/simulacijska vježba, koju je Misija OSCE-a u BiH organizovala u saradnji sa Ministarstvom sigurnosti Bosne i Hercegovine uz podršku Ambasade SAD u Sarajevu. Članica VIPK Tima za borbu protiv mržnje „PeaceBuilding“ Almedina Kašić iz Konjica aktivno je učestvovala u simulacijskoj vježbi s ciljem utvrđivanja modaliteta na koji način Bosna i Hercegovina može odgovoriti sigurnosnim izazovima koje predstavlja nasilni ekstremizam.

+ VIPK UČESTVOVAO NA OKRUGLOM STOLU O ZAPOŠLJAVANJU U JAVNOJ UPRAVI

U sarajevskom hotelu Evropa, 03.03.2016. godine održan je okrugli sto na temu „Zapošljavanje u organima javne uprave sa posebnim osvrtom na primjenu zakonskih principa“, kojem je prisustvovao i član VIPK-a Mirsad Čukle iz Konjica.

+ KONJIC: 500 GRAĐANA POTPISNICI PETICIJE ZA UKIDANJE ZDRAVSTVENE MARKICE UGROŽENIM KATEGORIJAMA STANOVNIŠTVA



Potpisivanjem peticije 23. marta na temu "Zdravlje je pravo, a ne privilegija" oko 500 građana Konjica podiglo je svoj glas i potpisivanjem peticije i ispunjavanjem on line zahtjeva zatražili su da zakonodavna i izvršna vlast HNK pod hitno uskladi kantonalni propis sa Federalnom Odlukom o participaciji. Političari u Hercegovačko-neretvanskom kantonu ne poštuju Odluku Federalnog parlamenta iz 2009. godine po kojoj je petnaest socijalnih kategorija, oslobođeno plaćanja participacije u zdravstvu, jer naplaćuju participaciju djeci do petnaest godina, kao i invalidima i porodiljama, te penzionerima koji imaju iznad 65 godina. Iako zakonska rješenja određuju kategorije stanovništva koje su oslobođene plaćanja participacije za usluge zdravstvene zaštite, četiri kantona (HNK, TK, ZHK i SBK) zadržavajući kao obavezne troškove participacije odbijaju da ispoštuju zakon. Ova kampanja provodi se širom Federacije Bosne i Hercegovine, a aktivnosti u Konjicu realizovale su nevladine organizacije (članice zdravstvene mreže), Partnerstvom za zdravlje, ICVA, Volonteri i prijatelji konjičke regije i Udruženje dijaliznih pacijenata Konjic.





NVO SNAGA MLADIH / NGO YOUTH POWER

Kralja Petra Krežimira IV L2/5 88000 Mostar, BiH

Tel.: 036 835 028, 835 029

E-mail: ngo-youth.power@gmail.com

Web: www.youth-power.org

FB: [NGO Youth Power/](https://www.facebook.com/NGOYouthPower/) Twitter: [NGOYouthPower](https://twitter.com/NGOYouthPower)

✚ OSMOMARTOVSKA AKCIJA „BUDI MUŠKO“ KLUBOVA

Članovi „Budi Muško“ Klubova iz Banja Luke, Sarajeva i Mostara su povodom Međunarodnog dana žena građanima Banja Luke dijelili kutijice s biografijama djevojaka i žena koje čine pozitivne promjene u našoj državi. CARE International, partnerske organizacije: Youth Power, Institut za razvoj mladih i zajednice Perpetuum Mobile i Asocijacija XY su zajedno sa svojim „Budi Muško“ Klubovima iz Mostara, Banjaluke i Sarajeva organizovali akciju povodom Međunarodnog dana žena.

Djevojke i mladići iz tri grada – Sarajeva, Banja Luke i Mostara su zajednički isplanirali akciju čiji je cilj bio promovisati djevojke i žene koje čine pozitivne promjene u lokalnim sredinama ali i na području cijele države. Članovi „Budi Muško“ Klubova izradili su kutijice s porukama čestitke Međunarodnog dana žena u koje su stavili kratke biografije 20 djevojaka/žena iz cijele BiH. Preko 1000 kutijica je podijeljeno građanima Banja Luke koji su se zatekli na Trgu Krajine.

Također, mladi ljudi iz ovih klubova su bili dio **Osmomarša**, koji je organizovan s ciljem ukazivanja na brojne izazove i probleme s kojima se žene u našoj državi danas suočavaju.

Da podsjetimo; Međunarodni dan žena (skraćeno Dan žena) obilježava se 8.3. svake godine. Tog dana se slave ekonomska, politička i društvena dostignuća pripadnica ženskog spola. Prvi Dan žena je obilježen 28. 02.1909. u SAD-u deklaracijom koju je donijela Socijalistička partija Amerike. Između ostalih važnih povijesnih događaja, njime se obilježava i požar u tvornici Triangle Shirtwaist u New Yorku 1911. godine kada je poginulo preko 140 žena.

Aktivnost je dio projekta „Promovisanje zdravijih životnih stilova među mladima u BiH osporavanjem rodni stereotipa“. Projekat je podržan od strane Švicarske Vlade i OAK Fondacije, a implementira se uz podršku CARE International, Balkans.



OMLADINSKO UDRUŽENJE NOVA VIZIJA

Opara bb, 72 290 Novi Travnik

Tel./fax: 061 309 687, 061 593 773

E-mail: ounovavizija@gmail.comFacebook: <https://www.facebook.com/ounovavizija>

Omladinsko udruženje Nova vizija je u mjesecu martu realizovalo brojne aktivnosti, od kojih je svakako najinteresantnija obilježavanje dvije godine edukativnih radionica Nove vizije. Svečanom edukativnom radionicom "Izloženost mladih izazovima modernog doba i način prepoznavanja rizika" obilježene su dvije godine radionica, a prva je održana 17.03.2014 godine u sklopu projekta Eko buđenje grada mladosti". Iza naših vizionara brojne su edukativne radionice iz oblasti ekologije, ljudskih prava, prevencije nasilja, komunikacije i sl., a sa istim

sadržajima nastavlja se i u narednom periodu.

U toku mjeseca februara članovi/ice Nove vizije uz podršku mladih iz ovog grada realizovali su i ulični performans rušenja zida diskriminacije, koji se realizovao u sklopu projekta "ZID" u još 5 gradova Bosne i Hercegovine.



Članovi Nove vizije tokom mjeseca marta realizovali su pored radionica u Omladinskom centru i edukativne radionice u Mješovitoj srednjoj školi Novi Travnik. Ukupno je održano 22 radionice sa učenicima prvih i drugih razreda, u sklopu projekta "Promovisanje zdravih životnih stilova među mladima u BiH, osporavajući rodne stereotype", koji podržava Care International.

U toku mjeseca aprila planirano je niz aktivnosti od koji su edukativno-ekološki izlet za mlade, radionice, ekološke akcije...



INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: kult@mladi.org

Tel.: 033 778 778; fax: 033 778 779

Web: www.mladi.org

✚ IZMIJENAMA ZAKONA O PDV-U DO PRIVREDNOG RAZVOJA

Kako bi pomogao privredi, kroz unapređenje postojećih uslova poslovanja, Institut za razvoj mladih KULT zajedno sa članicama Mreže za kreiranje boljeg poslovnog ambijenta u BiH zagovara izmjene Zakona o porezu na dodanu vrijednost, prema kojim bi obveznici plaćali PDV po naplati izvršene usluge isporučenog dobra, a ne po izdavanju fakture.

Jedan od prvih koraka bio je organizovanje Okruglog stola "Izmjene i dopune Zakona o PDV-u - uvođenje sistema oporezivanja prema naplaćenim naknadama", koji je održan 10. marta u Hotelu "Sarajevo" u Sarajevu.



Kako je zaključeno na Okruglom stolu, rokovi za uplatu PDV-a državi moraju se pomjeriti, i to na posljednji dan u mjesecu. Ekonomska stručnjakinja i panelistica Okruglog stola Svetlana Cenić dodala je da se izmjenama poreskog sistema mora pristupiti strateški i to na nivou izmjena cjelokupnog finansijskog sistema BiH. Pod tim se, kako je istakla, prvenstveno podrazumijeva izmjena sistema PDV-a u raspodjeli, te izmjena Zakona o fiskalnoj odgovornosti. Neophodno je, dodala je, uvezati i fiskalni sistem na nivou države, te sa poreskim i geodetskim upravama.

Prema sadašnjem Zakonu o porezu na dodanu vrijednost, poreski obveznici su dužni podnijeti prijavu

i platiti PDV od 1. do 10. u mjesecu po isteku poreznog perioda, bez obzira na to jesu li naplatili svoja potraživanja po osnovu prometa dobara i usluga ili ne, što u konačnici brojne poslovne subjekte čini nelikvidnim.

Jačanje privrede neophodno je za ekonomski prosperitet BiH, a upravo je razvoj malog i srednjeg poduzetništva prilika za mlade.

Kako je tokom trajanja Okruglog stola istakao Jasmin Bešić, izvršni direktor Instituta za razvoj mladih KULT, Institut je do sada radio vrlo uspješno na izradi i provođenju zakonskih rješenja koja doprinose poboljšanju društvenog položaja mladih. "Obzirom da su ekonomska pitanja izvor većine problema mladih ljudi, Institut želi uključiti stručnu i drugu javnost u dijalog u vezi sa stvaranjem povoljnijeg poslovnog prostora u BiH ne samo za mlade nego za sve preduzetnike", istakao je Bešić.

Izmjenom Zakona o PDV-u dodatno se može potaknuti razvoj malog i srednjeg poduzetništva, što će utjecati i na razvoj ekonomije i bolje investicijske klime. Primjena navedenog postupka nije obavezna, te porezni obveznici mogu sami odlučiti hoće li primjenjivati postupak oporezivanja prema naplaćenim naknadama.

Okruglom stolu prisustvovali su predstavnici Uprave za indirektno oporezivanje, članovi Parlamenta BiH, predstavnici privrede, akademskog i nevladinog sektora, te ostalih relevantnih organizacija i institucija.

Okrugli sto organizovan je u okviru inicijative "Poslovni prostor BH" koju vodi Institut za razvoj mladih KULT, a koja je dio Projekta održivosti civilnog društva u Bosni i Hercegovini (CSSP), koji realizuju Centri civilnih inicijativa (CCI) i Centar za promociju civilnog društva (CPCD), a koji je podržan od Američke agencije za međunarodni razvoj (USAID).

✚ “MORATE SE BORITI!”, PORUČILA MLADIMA MINISTRICA OBRAZOVANJA U VLADI ŠVEDSKE AIDA HADŽIALIĆ



Ambasada Kraljevine Švedske i Institut za razvoj mladih KULT organizovali su za mlade druženje – Kafu sa... Aidom Hadžialić, jednom od najmlađih ministrica u historiji ove zemlje koja je danas uzor brojnim mladim ljudima.

Mladi su ministrici predstavili brojne izazove sa kojima se susreću u Bosni i Hercegovini, a ministrica Hadžialić im je kroz primjere sistema u Švedskoj ponudila moguća rješenja za prevazilaženje problema, uglavnom u domenu obrazovanja.

Kako je isticala tokom druženja, snaga leži u mladim ljudima. Poručila je da se i Švedska suočavala sa brojnim krizama, ali su joj u

prevazilaženju problema pomogli upravo mladi. Kako je rekla, to su činili kroz svoje obrazovanje, prekvalifikacije i aktivno sudjelovanje u društvenim dešavanjima.

Ministrica je govorila i o švedskom modelu obrazovanja, te njegovoj eventualnoj primjeni na Balkanu, a mogla bi se primijeniti i praksa češćih susreta sa predstavnicima mladih. Prema njenim riječima, kao ministrica obrazovanja sa mladim se susreće svaka dva mjeseca.

Na pitanje da li je uz promjene postojećeg sistema u Bosni i Hercegovini moguće imati uspješne mlade ljude, ministrica je odgovorila: „Morate se boriti! Trebate znati da ste vi odgovorni za svoj život i da ne postoje izgovori. Morate naći rješenja i boriti se da uspijete“.

Aida Hadžialić rođena je 1987. godine u Foči, ali je kao petogodišnjakinja odselila u Švedsku. Po zanimanju je pravica, a u politiku se uključila kada je imala 16 godina. Članica je Socijaldemokratske unije, a prije funkcije državne ministric obrazovanja, obavljala je funkciju zamjenice gradonačelnika Halmstada.

✚ “TEŠKO JE, ALI SE PREPREKE MOGU PREVAZIĆI” – PORUČILE ŽENE NA DAN BORBE PROTIV NASILJA NAD ŽENAMA I DJEVOJČICAMA

Aktivisti i aktivistice Instituta za razvoj mladih KULT, uz podršku Ambasade SAD-a u BiH, Narandžasti dan - Dan borbe protiv nasilja nad ženama i djevojčicama obilježili su prikazivanjem najave filma “(ON)A?” u multipleksu Cinema City u Sarajevu, koji predstavlja žene našeg društva kao hrabre junakinje svakodnevnog života.



“Napravili smo ovaj film kako bismo se zahvalili svim ženama, veličanstvenim heroinama. Na ovaj način želimo im pokazati da beskrajno cijenimo ono što rade. Želimo istaći važnost njihovog postojanja, jer njima herojstvo dolazi prirodno. Najzad one su nas donijele na ovaj svijet, a mi ih nažalost često uzimamo zdravo za gotovo. Hajde da im damo ono što zaista zaslužuju - zahvalnost, poštovanje i beskrajnu ljubav.” - istakla je obraćajući se prisutnim Mirela Ajanović iz Instituta za razvoj mladih KULT.

Prikazivanju najave filma “(ON)A?” prisustvovala su i žene čije su životne priče bile tema filma.

„Drago nam je da je neko odlučio dati priliku da i žene

koje nisu javne ličnosti ispričaju svoje životne priče, jer imamo šta reći. Nastavit ćemo se boriti kako bi zauzele mjesto u društvu koje nam pripada“ – poručile su glavne akterke filma.

Nakon projekcije je organizovano i druženje kako bi žene iz svih sfera razmijenile iskustva, te razgovarale o preprekama sa kojima se svakodnevno susreću.

Prema podacima Agencije za ravnopravnost spolova, 52,8% žena je pretrpjelo neki oblik nasilja. Mada određeni statistički podaci postoje, o pravim brojkama teško je govoriti.

Institut za razvoj mladih KULT, uz podršku Američke ambasade u Sarajevu, provodi projekt „Orange voices for gender equality“. Jedan od ciljeva projekta je da svakog 25. u mjesecu obilježi Narandžasti dan (Orange day), promovira i lobira za jednakost spolova, obilježava i bori se protiv nasilja nad ženama i djevojčicama, te podiže svijest javnosti i građana o ovoj problematici.

Generalni sekretar UN-a proglasio je svaki 25. u mjesecu "Narandžastim danom" (Orange Day), kao dan podsjećanja na važnost prevencije, sprječavanja i sankcionisanja nasilja nad ženama i djevojčicama.

U USK SE INTENZIVNO RADI NA IZRADI STRATEGIJE PREMA MLADIMA


U Bihaću je u martu održana obuka za Radnu grupu Vlade USK, koja je zadužena za proces izrade Strategije prema mladima u ovom kantonu.

Pohvalna je činjenica da je radna grupa od početka decembra prošle godine, kada je potpisan sporazum o saradnji u procesu izrade Strategije između Instituta za razvoj mladih KULT i Vlade USK, napravila nekoliko veoma značajnih koraka. Već su urađene analize stanja u oblasti mladih u institucijama, a razmatrani su i potencijalni strateški ciljevi Strategije prema mladima.

Obuci su pored članova Radne grupe prisustvovali i predstavnici Vijeća mladih USK, te Instituta za razvoj mladih KULT, koji u ovom procesu pruža stručno – konsultativnu podršku.

Očekuje se da bi se uskoro i Strategija prema mladima FBiH trebala naći pred Vladom FBiH. Cilj Strategije je poboljšati položaj mladih kroz stvaranje odgovarajućih uslova za bolji i učinkovitiji rad sa mladima u FBiH, njihovim udruženjima, te koordinaciju aktera odgovornih za sva pitanja mladih.

Strategija prema mladima se u FBiH donosi se prvi put, i to za period 2016-2020., a u izradi nacрта sudjelovali su članovi iz osamnaest institucija FBiH.





OMLADINSKA ORGANIZACIJA "SVITAC"

Jusufa Čampare bb, 76 100 Brčko Distrikt

Tel./Fax: 049 211 032

Email: svitac@teol.net

Web: www.svitac.org

Facebook: www.facebook.com/omladinska.svitac

+ DNEVNE RADIONICE



Omladinska organizacija Svitac je u martu nastavila sa svakodnevnim aktivnostima. Učesnici su podijeljeni na dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Grupe sa mališanima su ovog mjeseca pravile kolaže na temu životinje i basna (bubamara, miš, slon, zec) koristeći vodene, drvene i akrilne boje, kao i vatu, ljepilo, karton i kolaž papir. Učesnici dnevnih radionica su takođe pravili figure od tijesta koristeći vodene boje i papirne avione, balone za letenje. Jutarnja grupa je svakog četvrtka učila i ponavljala brojeve od 1-6, koristeći radne listove za bojenje, zatim su počeli učiti tekst pjesme "Djeca su ukras svijeta", te su pravili čestitke za mame i tate. Cilj ovih aktivnosti je da djeca razviju maštu i da koristeći

razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U februaru je između 25 i 30 učesnika pohađalo jutarnje kreativne radionice.

Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+) Ponedjeljom je na rasporedu engleski jezik, alfabet, izgovor, i fleš kartice za ponavljanje vokabulara i sastavljanje rečenica. Velika grupa na engleskom je ponavljala i učila o razlikama gramatičkih tempora i pasiva te su kroz igru vježbali svakodnevnu komunikaciju. Utorkom kreativno izražavanje na temu 3D crtanje, razne figure od tijesta i kreativno izražavanje kroz crtanje i slikanje koristeći akrilne boje, flomastere, drevne bojice i kolaž papire. Srijedom je muzička radionica, gdje učesnici imaju priliku da nauče osnove teorije muzike, da nauče više o muzičkim instrumentima (truba, gitara ili klavir) te da razvijaju sposobnosti komunikacije i dijaloga na temu ritam, note i razni pravci muzike. Četvrtkom je sportski dan, gdje se organizuju razne vrste igara sa loptom, upoznavanja sa osnovama ragbija, karatea, i za zabavu magični trikovi i dramske radionice sa novim skečom (Karius i Bakterius). Grupa je podijeljena u dvije manje i učesnici imaju mogućnost da izaberu sport ili dramu.

Petak je dan za učenje osnova njemačkog jezika, kao i za pomaganje u izradi domaće zadaće.

Radionice se održavaju u Omladinskom centru Brčko distrikta. Koordinator radionica u martu je bila Slađana Bašić uz asistenciju lokalnih i Weltwaerts i EVS međunarodnih volontera Jonasa Kiesnera, Anne Bonitz i Johanne Weng iz Njemačke, Vanesse Brumen iz Austrije, Evana Pearce iz Kanade te Monice Reeves iz Velike Britanije. Broj učesnika starije grupe je trenutno 15.

+ JEZIČKE RADIONICE

Kursevi engleskog i njemačkog jezika su nastavljani i u martu. 35 studenata trenutno pohađa ove kurseve i podijeljeni su u tri grupe (Početni 1, Početni 2 za djecu i odrasle i Srednji 1 za djecu).

Svaka grupa ima dva časa sedmično u trajanju od sat i po, a časovi se održavaju u prostorijama Omladinske organizacije Svitac i Omladinskog centra Brčko distrikta. Starost studenata je od 8 do 35 godina.

+ MUZIČKE RADIONICE

Početak ovog mjeseca EVS volonterka Monica Reeves je počela raditi sa grupom djece (uzrast 8-12 godina) na komponovanju jednostavnih i kratkih melodija.

✚ RADIONICE GITARE

Učesnici radionice gitare u martu su nastavili sa redovnim radom i pohađanjem radionica.

✚ RADIONICE SAMBE

U martu su nastavljene radionice samba udaraljki na kojima su učesnici radili na varijacijama njima poznatih kompozicija.



✚ 21ST. MARCH 2016 – „HAND IN HAND AGAINST RACISM“



Omladinska organizacija Svitac je 21. marta organizovala tri vrste aktivnosti za djecu i mlade iz Brčko distrikta, te na taj način obilježila međunarodni Dan borbe protiv rasizma. Prva radionica je održana za djecu od 4-6- godina. Za njihov uzrast prezentovana je priča od Kathryn Cave „Nekako drugačiji“, sa sadržajem o prijateljstvu i razlikama između ljudi. U drugom dijelu radionice učesnici su nacrtali jednu od situacija iz priče i kroz razgovor došli do zaključka da uprkos razlikama u izgledu ili ponašanju, ljudi mogu biti prijatelji.

Na drugoj aktivnosti učesnici su pogledali kratku prezentaciju i priču na temu Rosa Parks, gdje je ukazano na razne probleme i diskriminaciju Afroamerikanaca u 60-im u Americi, a koja je ujedno bila i uvod u diskusiju na temu 'rasizam'. Nakon priče učesnici su zajedno napravili lanac od papira u obliku ljudi koji se drže za ruke, a koji je predstavljao moto radionice: „Ruka u ruci protiv rasizma“.

U večerenjem terminu održana je treća aktivnost: Filmsko veče za mlade ljude sa diskusijom u završnici. Učesnici radionice su imali priliku pogledati četiri kratka filma na temu 'rasizam', te su nakon projekcije bili podijeljeni u manje grupe, kako bi nakon kraćeg konsultovanja u velikom krugu ukratko prezentovali u tezama važnije aspekte iz filmova i eventualne prijedloge za više tolerancije, te moguće odgovore na pitanje kako se nositi sa predrasudama i diskriminacijom.

Za april se planira nastavak svih redovnih radionica Omladinske organizacije Svitac.





H.O. Muslimansko dobrotvorno društvo – MERHAMET DOBOJ

Kralja Aleksandra 17, 74 000 Doboj

Tel./fax: 053 226 886

E-mail: merhamet.doboj@cutuk.net

Web: www.ngo.ba; www.facebook.com/Merhamet-Doboj

Članice Koalicije „Tolerantno i pozitivno iz Doboja“: Omladinska organizacija „Šesto čulo“ Doboj, UG „Topeer“ Doboj, H.O. „Merhamet“ Doboj i Bošnjačka zajednica kulture „Preporod“ Doboj prisustvovali su javnom govorenju pod nazivom: „Moja priča – Izaberimo mir zajedno“, koji je održan 2. marta u velikoj sali Skupštine grada Doboja, a u organizaciji „PRO-Budućnost“.



Volonteri „Merhameta“ prisustvovali su „Sajmu hrane, unikatnih radova i rukotvorina“ za žene koje dolaze iz različitih etničkih i religijskih grupa, a u okviru projekta „Jedinstvo u različitostima“, finansiranog kroz četverogodišnji projekat Američke agencije za međunarodni razvoj (USAID) - PRO Budućnost - izgradnja pomirenja i povjerenja među građanima svih etničkih grupa u BiH. Sajam je organizovala omladinska organizacija „Šesto čulo“ Doboj, u saradnji sa vjerskim zajednicama iz Doboja (Katolička, Jevrejska i Islamska) 2.marta.



Volonterka „Merhameta“ Doboj - Semra Jašarević učestvovala je na radionici za mlade „Učiti živjeti zajedno“, koju je organizovala omladinska organizacija „Šesto čulo“ Doboj od 18. do 20. marta 2016.godine, u sklopu projekta „Jedinstvo U Različitostima“ finansiranog od strane „PROBudućnost - USAID“.



Podjela humanitarne pomoći za članove “Merhameta” Doboju organizovana je 26. marta 2016 godine.



Predsjednica Avdić Faketa prisustvovala je regionalnom sastanku predstavnika radnih grupa za izradu plana kohezivne zajednice i koalicija protiv mržnje.



SAOPŠTENJA / INFORMACIJE / DONATORI / POZIVI

1. Evropska Omladinska nagrada 2016: nagrade za najkreativnije digitalne projekte

Peti put zaredom EYA pronalazi i nagrađuje najkreativnije digitalne projekte kao što su internet stranice, aplikacije, nosivi uređaji, pametni uređaji i digitalne instalacije. Projekti mogu biti prijavljeni u sedam kategorija koje se odražavaju na EU strategiju “Evropa 2020”.

Kategorije projekata:

- Zdrav život (fitnes; ishrana; medicinska Njega; medicinska tehnologija)
- Pametno učenje (edukacija; elektronske vještine; otvorena nauka; zabavne informacije)
- Povezivanje kultura (jezik; putovanje; raznolikost; nove zajednice)
- Zeleni pokret (održiva energija; pokretnost; pametni gradovi; klimatske promjene)
- Aktivno državljanstvo (građansko novinarstvo; društvena povezanost; ljudska prava; osnaživanje žena i muškaraca)
- Značaj novca (finansijska pismenost; zaposlenost; prikupljanje donacija; finansijske tehnologije)
- Otvorene inovacije (problematične aplikacije; igre; lude stvari; digitalna magija)

Prijave su otvorene do 15. jula 2016. godine.

Dodatne informacije: [EYA-2016](#)

Izvor: <http://studomat.ba/european-youth-award-2016-nagrade-za-najkreativnije-digitalne-projekte/55668/>

2. UNESCO – sedmi poziv za podnošenje zahtjeva za finansiranje projekata sredstvima iz Međunarodnog fonda za kulturnu raznolikost

UNESCO je otvorio sedmi poziv za podnošenje zahtjeva za finansiranje projekata sredstvima iz Međunarodnog fonda za kulturnu raznolikost (u daljem tekstu “IFCD”).

IFCD podržava projekte zemalja u razvoju, koji vode ka strukturnim promjenama kroz uvođenje i/ili izradu politika i strategija koje imaju direktan uticaj na stvaranje, proizvodnju, distribuciju i pristup raznolikosti kulturnih izraza, kao i jačanje institucionalnih infrastruktura, podržavajući održive lokalne i regionalne kulturne industrije, što je uspostavljeno Konvencijom o zaštiti i promociji raznolikosti kulturnih izraza 2005. godine.

Projekti koje podržava IFCD pokrivaju širok spektar aktivnosti – od izgradnje kapaciteta do analize i razvoja politika, podrške preduzetništvu i konsolidacije kulturnih industrija, a koje su u skladu sa ciljevima Konvencije iz 2005. godine o zaštiti i unapređenju raznolikosti kulturnih izraza. Više informacija o projektima koji su do sada finansirani iz IFCD-a, možete naći na sljedećem linku: <http://en.unesco.org/creativity/ifcd/discover-projects/database-funded-projects>

Na konkurs se mogu prijaviti organi javne uprave, institucije i nevladine organizacije iz zemalja u razvoju koje su članice Konvencije, kao i međunarodne nevladine organizacije.

Maksimalan iznos sredstava koja se mogu tražiti za implementaciju projekta u okviru ovog Fonda je 100.000 US\$, a trajanje projekta može biti od 12 do 24 mjeseca.

Isključivi način podnošenja prijava projekata je putem online aplikacijske platforme.

On-line aplikacijska platforma je dostupna na engleskom i francuskom jeziku:

<https://en.unesco.org/creativity/ifcd/apply> (na engleskom jeziku)

i <https://fr.unesco.org/creativity/fidc/soumettre-demande> (na francuskom jeziku).

Rok za prijavu projekata putem on-line aplikacijske platforme je **15. april 2016. godine, do ponoći.**

Izvor: <http://unescoibih.mcp.gov.ba/konkursi/?id=14720>

3. UNESCO nagrada za obrazovanje djevojčica i žena

Rok 15.4.2016. godine

UNESCO je raspisao poziv za dostavljanje nominacija za prvo izdanje dodjele nagrada za doprinos u oblasti obrazovanja djevojčica i žena, a koje finansira Vlada Narodne Republike Kine. Cilj ovog poziva je nagraditi aktivnosti pojedinaca, grupa, organizacija i centara koji promoviraju obrazovanje djevojčica i žena, u skladu sa UNESCO politikama i ciljevima u ovoj oblasti. Nagrada se sastoji od diplome i iznosa od 50.000 \$ pojedinačno za dva dobitnika. Nominirani kandidati moraju biti osobe koje su se istakle kroz aktivnosti koje su doprinijele promociji obrazovanja za djevojke i žene.

Više informacija o ovom pozivu možete naći na sljedećem linku: <https://en.unesco.org/themes/women-and-girls-education>.

Nominacije za nagradu se podnose na nominacionom obrascu koji se može preuzeti [ovdje](#).

Nominacioni obrazac i prateće dokumente je potrebno dostaviti na engleskom jeziku uz prijevod na jedan od službenih jezika u upotrebi u BiH. Obrazac je potrebno dostaviti poštom **najkasnije do 15. aprila 2016. godine** Državnoj komisiji za saradnju BiH sa UNESCO-m na sljedeću adresu:

Ministarstvo civilnih poslova BiH

Državna komisija BiH za UNESCO

Trg BiH br. 1, 71000 Sarajevo

Izvor: <http://unescobih.mcp.gov.ba/konkursi/?id=14747>

4. Prilika za unapređenje vještina na Excellence Academy BH

Akademija izvrsnosti Bosna i Hercegovina, kao prilika za studente da ispolje talente koje imaju i svoj puni potencijal, bit će održana u periodu od 6. do 8. maja ove godine u Sarajevu.

Akademija će pomoći studentima da rade ono što znaju raditi najbolje, da rade ono što vole i da rade ono čime mogu osigurati egzistencijalne potrebe te primjerom doprinijeti napretku društvene zajednice, Akademija navodi kao svoj primarni cilj.

Međunarodni olimpijski projekat prepoznao je Akademiju kao vrijedan međunarodni projekat u sklopu svog novog događaja Youth Olympic Games – Omladinske Olimpijske Igre (YOG) koji je usredotočen na edukaciju mladih kroz vrijednosti sporta.

Akademija je dizajnirana prema potrebama mladih u Bosni i Hercegovini. Okuplja najbolje i najmotiviranije studente iz svih gradova Bosne i Hercegovine koji kroz intenzivnu edukaciju sa najboljim predavačima dobijaju nove životne sposobnosti, uz pomoć kojih kasnije mogu iskoristiti svoje talente kroz individualne i organizovane aktivnosti Akademije te tako poticati svoju društvenu sredinu na promjene.

Tri osnovne teme rada Akademije su: **nadilaženje etničkih podjela kroz sport i edukaciju, svijest o problemu ovisnosti i biti promjena u društvu kroz izražavanje talenata i sposobnosti**. U skladu sa navedenim temama, sklopljena su i tri programa Akademije sa različitim aktivnostima.

Konkretno, aktivnosti Akademije, čija je parola „Nadahnuti, motivisati i uraditi“, podrazumijevaju učenje i razgovor sa vrhunskim predavačima i uspješnim pojedincima; učenje o pojmu pluralnog društva BiH kao svjetske paradigme pluralnosti; saznanja o uticaju sporta na društvo i razvoj identiteta; edukovanje alatima 'life and skills developmenta' za usmjeravanje i korištenje ličnih talenata, iskustvo govora pred publikom i kamerama; team building aktivnosti; okrugli sto o potrebnim budućim koracima, te činjenje prvih koraka, za širenje pozitivnih promjena kod mladih u BiH; poslovno okruženje sa utvrđenim kodeksom ponašanja; predavanja na historijski znamenitim mjestima i vodećim državnim, regionalnim obrazovnim ustanovama; hotelski smještaj, hranu, troškove puta; te certifikat Olimpijskog komiteta Bosne i Hercegovine.

Prijave za učešće na Akademiji otvorene su za studente druge i treće godine fakulteta iz BiH sa minimalnim prosjekom ocjena od 8,5.

Ukupno će biti primljeno **15 studenata** iz cijele BiH, s tim što mogu biti primljena maksimalno dva studenta iz jednog grada.

Kandidati moraju poslati popunjen prijavni obrazac sa motivacionim pismom, ovjerenu potvrdu o prosjeku ocjena sa fakulteta, potvrdu o mjestu prebivališta, te, neobavezno, CV do maksimalno dvije stranice dužine. Navedeno je potrebno poslati na internet adresu info@excellenceacademy.ba. do 20. aprila.

Prijavni obrazac, kao i druge opširnije informacije, mogu se pronaći na službenoj internet stranici Akademije <http://www.excellenceacademy.ba>.

Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

WEB stranica Mreže:
www.omladina-bih.net

Mejling lista Mreže:
posta@omladina-bih.net

sCh design

Webmaster:
Emir Delalić-Zeko - Tuzla
emir.delalic@gmail.com

Adrese za slanje vaših informacija za mjesečni bilten:

Omladinski resursni centar Tuzla
Hadži Bakirbega Tuzlića 1,
75000 Tuzla
tel / fax: 035 258 077
e-mail: orctuzla@bih.net.ba
hcatuzla@bih.net.ba

Mjesečni bilten uređuje Omladinski resursni centar - ORC Tuzla
